

Headlines

1. प्रधानमंत्री नरेन्द्र मांदी होरें आखेआ ऐ जे भारत, रिफार्म, परफार्म ते ट्रांसफार्म दे मंत्रर कन्नै अगगे बधदे होई होरनें मुखें गी बी मंदी चा बाह्र कडुने दी स्थिति च आई पुजे दा ऐ।
2. एलजी मनोज सिन्हा होरें श्रीनगर च Indian Chamber of Commerce आईसीसी दे सदस्यें कन्नै गल्लबात कीती ते आखेआ जे कश्मीर, आतंकवाद दे डर कोला बाह्र आइयै हून विकास-बादे ते निवेश बक्खी अगड़ा बधा करदा ऐ।
3. खेडू मंत्री सतीश शर्मा होरें आखेआ ऐ जे जम्मू-कश्मीर, पानी आहली खेडू दे खेत्तर च देसै दी इक अगुआ थाह्र बनने दी दिशा च अग्रसर ऐ।
4. खेलो इंडिया वॉटर स्पोर्ट्स फेस्टिवल च मोहसिन अली, सज्जाद ते मोहम्मद हुसैन होरें जम्मू-कश्मीर दा नांऽ रोशन कीता ऐ।
5. जम्मू दे बक्ख-बक्ख हिस्सें च भारी बरखा दे चलदे केई इलाकें च पानी भरोचने करी जन जीवन प्रभावत। मौसम विभाग नै अगले 24एं घैंटे दरान लगातार भारी बरखा दी चेतावनी जारी कीती दी ऐ।

<><><><><><>

PM Economy

प्रधानमंत्री नरेन्द्र मोदी होरें आखेआ ऐ जे भारत, दुनिया दी सब्भनें शा तेज रफ्तार कन्नै बधदी इक बड़ी अर्थबवस्था ऐ ते बड़ी तौले गै आलमी सतह उप्पर भारत इस दुनिया दी त्रीये नम्बरै दी सब्भनें शा बड़ी अर्थबवस्था बनी जाह्ग। दिल्ली च इक निजी मीडिया घराने आसेआ आयोजित कार्यक्रम च बोलदे होई श्री मोदी होरें आखेआ जे भारत, पूरी ताकत ते तगड़ेयाई दे कन्नै दुनिया लेई नमिएं मेदे दी इक लोऽ दे तौर पर खडोते दा ऐ। प्रधानमंत्री हारें जोर देइयै आखेआ जे भारत, रिफार्म, परफार्म ते ट्रांसफार्म यानि सुधार, कारकरदगी ते सकारात्मक बदलावें दे मंत्रर कन्नै अगगे बधदे होई होरनें मुखें गी बी मंदी चा बाह्र कडुने दी स्थिति च आई पुजे दा ऐ।

<><><><><><>

LG-ICC

लेफ्टिनेंट गवर्नर मनोज सिन्हा होरें श्रीनगर च इंडियन चेंबर ऑफ कामर्स (I.C.C.) दे सदस्यें कन्नै मलाटी करियै जम्मू-कश्मीर च बपार ते उद्योग बधाने आस्तै उंदी पैहलकदमियें दी तरीफ कीती। उंनै भारत दी बन-सबन्नी सांस्कृतिक बरासत ते लचीलेपन पर लोऽ पांदे होई आखेआ जे श्रीनगर च आई.सी.सी दी मजूदगी आतंकवाद दे खलाफ इक मजबूत स्नेहा दिंदी ऐ ते दस्सदी ऐ जे कश्मीर च आतंकवादियें दा डर-त्राहू हून तकरीबन खत्म होई गेआ ऐ। एल.जी होरें जम्मू-कश्मीर च चला'रदे आर्थिक बदलाएं बकखी इशारा कीता, जेदी विशेषता बेहतर बुनियादी ढांचे ते नवेश च बाद्दा ऐ। उंनै निवेशकें गी पूरा समर्थन देने दा वायदा कीता ते भारत दी वैश्विक प्रतिस्पर्धा च सुधार करने ते विकसित भारत-2047 दे दृष्टिकोण गी साकार करने च आई.सी.सी दे योगदान दी सराहना कीती।

<><><><><><>

LG-Music

लेफ्टिनेंट गवर्नर मनोज सिन्हा होरें कल श्रीनगर दे इक निजी स्कूल च, भारत दी संगीत सरबन्धी विरासत दी समृद्धि दा जश्न मनाने लेई आयोजित कीते गेदे शास्त्रीय संगीत आहले इक उत्सव च हिस्सा लैता। इस मौके पर एलजी होरें भारती शास्त्रीय संगीत लेई दित्ते गेदे जोगदान लेई मन्ने-परमन्ने दे संतूरवादक अभय रूस्तम सोपोरी होरें'गी सम्मानित कीता। श्री सिन्हा होरें भारत दी कलात्मक परंपराएं कन्नै जुड़ने लेई युवाएं दा दिल बधाने ते सांस्कृतिक मुल्लें-कदरें गी बढावा देने सरबन्धी इस पैहलकदमी दी बड़ी मती सराहना कीती।

<><><><><><>

LG-Delegations

केई सारे डेलीगेशनें कल श्रीनगर च लेफ्टिनेंट गवर्नर मनोज सिन्हा हुं'दे नै मलाटी करियै उंनैगी जम्मू-कश्मीर च नमिएं काह्डें ते ग्रामीण विकास गी बढावा देने लेई रम्भी गेदी बड्डी पैहलकदमी बारै जानकारी दिती। जेएंडके डेयरी फारमर्स एसोसिएशन ते स्कास्ट कश्मीर दे शैक्षणिक अमले आहले इक सांझे डेलीगेशनै, संदीप सिंह चिब हुं'दी अगुवाई च एलजी हुं'दे नै मलाटी कीती ते उंनैगी औने आहले दिनें च आयोजित कीते जाने आहले पशु धन मेले बारै अवगत करोआया जेहदा मकसद प्रदेश च डेयरी फार्मिंग ते माल-बच्छे मतल्लक नमिएं काह्डें गी बढावा देना ऐ। तोआई 75 स्टूडेंट्स सैटेलाईट्स मिशन दे प्रोजेक्ट डरैक्टर डाक्टर के.

गोपालाकृष्णन होर बी एलजी हुं'दे नै मिले ते उ'नेंगी इसरो दे मार्गदर्शन हेठ 'कश्मीर सैटेलाईट' विकसित करने लेई आई.यू.एस.टी. अवंतीपोरा च इक सैटेलाईट इन्क्यूबेटर सेंटर खड़ेने बारै जानकारी दिती। एलजी होरें इ'नें दौनें पैहलकदमिएं दी सराहना करदे होई इ'नेंगी युवा सशक्तिकरण ते आत्मनिर्भरता दी दिशा च महत्वपूर्ण गैहू करार दिता।

<><><><><><>

PTC Announcement

आकाशवाणी जम्मू दे क्षेत्रीय समाचार एकांश आसेआ जम्मू जिले लेई अंशकालिक संवाददाता यानि PTC लेई दरखास्तां मंगियां गेइयां न। इच्छुक आवेदक जेहदी उमर 24 थमां 50 बरें दे बश्कार ऐ ते ओहू जम्मू जिले दा रौहने आह्ला ऐ, एदे लेई आवेदन करी सकदा ऐ। मेदवार कश पत्रकारिता च पी.जी डिप्लोमा, डिग्री या कुसै बी पंजीकृत यूनिवर्सिटी थवां ग्रैजुएशन ते पत्रकारिता च 2 बरें दा तजुर्बा होना लोड़चदा ऐ। मेदवार गी कम्प्यूटर पर खबर बनाने ते मीडिया कवरेज दे अनुभव सने सरबंध्यत लोड़चदे उपकरणें वगैरा दा इस्तेमाल करना बी औना चाईदा। आवेदक जिला सदर दफ्तर दी 10 किलोमीटर दी हद्द दे अंदर-अंदर रौहदा होना चाईदा ऐ। दरखास्त ते लोड़चदे दस्तावेजें दी कॉपी मेदवार गी क्षेत्रीय समाचार एकांश आकाशवाणी पंजतीर्थी जम्मू च 31 अगस्त 2025 संजा 6 बजे कोला पैहले- पैहले आइए दस्ती जमा करोआनी होग। इस बारै व्यापक जानकारी आकाशवाणी दी वेबसाइट www.newsonair.gov.in पर उपलब्ध ऐ।

<><><><><><>

Satish Water Sports

खेड्डें ते युवा मामलें सरबंधी मैहकमे दे मंत्री सतीश शर्मा होरें आखेआ ऐ जे जम्मू-कश्मीर, पानी आहली खेड्डें दे खेत्तर च देसै दी राजधानी बनने दी दिशा च अगड़ा बधा करदा ऐ। मंत्री होरें एहू गल्ल कल श्रीनगर दे एसकेआईसीसी च खेलो इंडिया वॉटर स्पोर्ट्स फेस्टिवल 2025 दे समापन समारोह दरान भाषण दिंदे होई आखी। सतीश होरें युवा खड्डारिएं दे जब्बे ते उपलब्धिएं दी सराहना करदे होई उ'नेंगी गुजारिश कीती जे ओहू शांति-रमानदारी, खुशहाली ते हिरख-प्रेम दा संदेस दूरै-दूरै तोहड़ी पुजाने आहले दूत बनन। जम्मू-कश्मीर च आलमी सतह दा खेड्डें सरबंधी ढांचा विकसित करने दी सरकार दी वचनबद्धता गी फही पक्का करदे होई मंत्री होरें इस खित्ते गी हुनर, नमें मौकें ते राश्ट्री गर्व दा इक नमां उभरदा केन्द्र करार दिता।

तोआई जम्मू-कश्मीर खेडू काउंसल दिएं सचिव नुज़हत गुल होरें इस मौके पर मीडिया कन्नै गल्लबात करदे होई आखेआ जे श्रीनगर च पानी आहिलएं खेडू सरबन्धी उत्सव दे कामयाब आयोजन नै जम्मू-कश्मीर च ऐकड़ी खेडू गी बढावा देने दि'आं नमियां मेदां पैदा कीतीआं न। उ'नें आखेआ जे इस गल्लै दे जतन कीते जाडन जे डल झील च हर ब'रे पानी सरबन्धी खेडू आहले उत्सव दा आयोजन कीता जा।

<><><><><><>

Water-Sports

डल झील दे आले-दोआले दे इलाकें च रौहने आहले त्रै युवा एथलीटें मोहसिन अली, सज्जाद हुसैन ते मुहम्मद हुसैन नै खेलो इंडिया वाटर स्पोर्ट्स फेस्टिवल-2025 च जम्मू-कश्मीर गी गौरव दोआया ऐ। मोहसिन नै पुरुषें दी कयार्किंग च सुन्ने दा तगमा जित्तेआ, जिसलै के सज्जाद ते मुहम्मद हुसैन नै कैनोइंग स्पर्धाएं च रजत ते कैहू दा तगमा जित्तेआ। भारती खेडू प्राधिकरण दे नेहरू पार्क केंद्र च प्रशिक्षित इनें खडारिएं राश्ट्रीय स्तर पर उत्कृष्ट प्रदर्शन करने आस्तै माली चुनौतियें दा सामना बी कीता। उंदे कोच जुल्फकार अली भट्ट नै उंदी प्रतिबद्धता दी सराहना कीती ते स्पोर्ट्स अथारिटी ऑफ इंडिया दी लम्मी अवधि दे ओलंपिक वीजन पर लौ पाई। त्रैवें एथलीटें अपनी उपलब्धियें दा श्रेय एस.आई.ए केंद्र गी दित्ता ते आखेआ जे कियां खेडू नौजोआनें गी नशीली दोआइयें कोला दूर रक्खने च मदद करदियां न ते उनेंगी उज्जवल भविक्ख दी बक्खी मार्गदर्शित करदियां न।

<><><><><><>

Weather

जम्मू दे बक्ख-बक्ख हिस्सें च जंदी रातीं थमां गै लगातार भारी बरखा बरै करदी ऐ जिस करी केई सारे इलाकें च बड़ा मता पानी भरोचने करी जन जीवन प्रभावत होआ ऐ। मौसम विभाग नै अगले 24एं घैंटे दरान जम्मू, डोडा, किश्तवाड़, पुंछ, रजौरी, रामबन, रियासी, सांबा, उधमपुर, अनंतनाग ते कुलगाम च बड़ी भारी बरखा दी पेशगोई कीती दी ऐ। सरबन्धत अधिकारिएं प्रदेश च ते खासकरियै जम्मू संभाग च केई सारी थाहें पर बहल फटने, चानचक्क हाड़ औने ते ल्हास-पस्सियां पौने दी शेंका बी जाहू कीती ऐ। मौसम विभाग नै कल्लै तोहड़ी इयै नेहू हालात बने दे रौहने बारै सोहगा सतर्क करदे होई बसनीकें गी सलाहू दित्ती ऐ जे ओहू अपनी सुरक्षा जकीनी बनाने लेई सब्भै लोड़चदी एहतियातां बरतन ते बेवजह सफर कोला बी परहेज करना।